


## Prof. dr Smail Pašalić



Nakon duge bolesti, 27.11.1998. preminuo je u Tuzli naš dragi i uvaženi kolega prof.dr Smail Pašalić. Dženaza je obavljena 30.11.1998. uz prisustvo velikog broja prijatelja, kolega studenata i drugih poštovalaca, a sahranjen je na groblju "Borić" u Tuzli. Od bolesti koja ga je zadesila početkom 1992. godine lišeni smo njegove prisutnosti na Građevinskom fakultetu u Sarajevu. Ipak su ga članovi Geodetskog odsjeka i uprave Građevinskog fakulteta često posjećivali i obavljali konsultacije. Sada smo ga na našu veliku žalost nepovratno izgubili.

Smail Pašalić rođen je 27.01.1929. u Starom Majdanu, općina Sanski Most. Nakon završetka Geodetske škole zaposlio se u Zavodu za fotogrametriju u Beogradu, gdje je radio do 1964. godine. Uporedo je studirao i 1961. diplomirao na Geodetskom odsjeku Građevinskog fakulteta u Beogradu.

Pošto je pokazivao sklonost za naučno-istraživački rad 1964. godine izabran je za asistenta, a već 1965. za predavača na Rudarsko-geološkom fakultetu u Tuzli za predmet Primijenjena matematika sa tehnikom računanja.

Magistrirao je na Elektrotehničkom fakultetu u Zagrebu 1969. godine uspješno odbranivši magistarski rad pod naslovom "Automatiziranje rješavanja zadataka iz numeričke matematike i njegova primjena kod obrade geodetskih podataka mjerenja". Iste godine nakon uspješno odbranjenog habilitacionog rada izabran je za docenta na Rudarsko-geološkom fakultetu u Tuzli.

Doktorsku disertaciju pod naslovom "Doprinos programiranju elektronskih digitalnih računala u oblasti računa izjednačenja" odbranio je na Geodetskom fakultetu u Zagrebu 1975. godine. Nakon toga izabran je u zvanje vanrednog profesora na Rudarsko-geološkom fakultetu u Tuzli za predmet Račun izravnjanja, a 1978. godine prelazi u Sarajevo, nakon što je izabran na Građevinskom fakultetu u isto zvanje za isti predmet. Pored toga predmeta na Građevinskom fakultetu u Sarajevu vrlo uspješno je predavao predmet Inženjerska geodezija.

Godine 1983. izabran ja za redovnog profesora za spomenute predmete.

Prof. Pašalić dao je vrlo veliki doprinos geodetskoj nauci i praksi. Napisao je četiri univerzitetska udžbenika: Računska tehnika i odabrane numeričke metode (Tuzla 1973.), Matematička statistika (Tuzla 1976.), Račun izravnjanja (prvo izdanje Sarajevo 1984., drugo izdanje Sarajevo 1989.) i Inženjerska geodezija (Sarajevo 1993.). Objavio je veliki broj naučnih i stručnih radova u stručnim časopisima bivše države.

Veoma uspješno je rješavao zadatke za privredu, kojih je bilo vrlo mnogo (tuneli, mostovi, željezničke pruge, putevi, klizišta, kontrola izgradnje tornjeva za termoelektrane i sl.). Čitav niz godina bio je autor Studije o slijeganju terena u gradu Tuzli.

Posebno želimo istaknuti njegov veliki doprinos na dužnosti glavnog i odgovornog urednika Geodetskog glasnika – stručnog časopisa Saveza geodetskih inženjera i geometara Bosne i Hercegovine.

Naš dragi Smail uživao je poštovanje zbog svoje stručnosti i radinosti, prijateljskog odnosa i otvorenosti. Zbog tih osobina sačuvat ćemo uspomenu na njega u svojim srcima.

Izgubili smo dobrog čovjeka. Neka mu je hvala za sve što je učinio.

*Nihad Kapetanović*